



UPA 2019/34  
26. Marts 2019  
Bentiaraq Ottosen

**Avammut tunioraaneq pillugu Naalackersuisunut susassaqtunullu sumulluunniit attuumassuteqanngitsumik nalilersueqqissaarluni inassuteqaasiortartussamik, Avammut Tunioraarneq pillugu Siunnersuisooqatigiinnik kingusinnerpaamik UPA2020-imi pilersitseqqullugit Naalackersuisut peqquneqarnissaannik siunnersuut. Ilanngullugu siunnersuutigineqarpoq, avammut tunioraarnerup siuarsarneqarneranut suliniutit ingerlaavartumik nalilersorneqartarnissaat siunnersuisooqatigiit suliassaannut ilaatinneqassasoq.**

(Inatsisartuni ilaasortaq, Karl-Kristian Kruse)

Aalisarnerup saniatigut aningaasarsiornitta ineriartortittuarnissaanik periarfissat atorluartariaqarpavut, inuussutissarsiutit ataavartut eqqarsaatigalugit nutaamik eqqarsaatissinneqarluta.

Atassummiit isumaqarpugut ukiuni kingullerni nunatsinni inuussutissarsiutit pillugit ineriartorneq annertusiartortoq tulluusimaarutigisariaqaripput, tamanna inuussutissarsiortortatsinnut nutaamik periarfissaqartitsilluarmat. Kalaallit Nunaata nunarsuarmioqataajartornera annertuumik sunniuteqarsimaqaaq, soorlu takornariaqarnikkut avammut nittarsaassinitta iluatsilluartumik ineriartornera maluginiagassaasoq.

Nunatsinni namminersortutut inuussutissarsiuteqarneq orniginarsartuartaqarpoq, isumaqaratta inuit pikkoriffii atorluarnerisigut inuussutissarsiut soqutiginarpoq ineriartortinneqarsinnaasoq. Inuussutissarsiutit pillugit nunat sanilerisavut suleqatigilluinnartariaqarpagut, soorlu takornariaqarnikkut ingerlatseqatigiiffiit namminersortut suleqatigineratigut nunat misilittagaat aallaavigalugit avitseqatigiinikkut ingerlanneqarsinnaasumik. Kisiannili inuussutissarsiutit ataasiinaavallaat isigineqartariaqanngillat, inuit soqutigisaat aallaaviginerusariaqarpagut imminut pilersornissatsinnik siunnerfeqartilluta.

Sumiluuniit avammut killeqanngitsumik niueqatigiinneq pisariaqartinneqartarpoq, tamanna aqut atorneqassasoq naatsorsuutigaarput nunat sanilerisavut suleqatigilerutsigit. Ataasiinnaavallaangitsumik isiginninnginnissaq pingaaruteqarluinnarpoq, uani akit appariartornerat ilutigalugu nunatsinni unammilleqatigiinneq inuussutissarsiortortatsinnut iluaqutaalersikkumallugu.

Nunatsinni inuussutissarsiornikkut ingerlatseqatigiiffiit avammut niuernikkut suliniuteqartut aamma nunatta iluani inuussutissarsiornikkut siuarsaasut isumaqarpugut sulilluarsimasut. Tamaattumik inuussutissarsiortortatta nuna manna inuussutissarsiorfigissallugu soqutigisarilersimavaat sulili annertusarneqaqqittariaqartoq isumaqarpugut.

Suliniutit angisuuni suliassaraarput nunatta avammut nittarsaanneqarnissaanut periuseqarnissarput, taamaattumik suliniuteqarneq angisuunik ersersittariaqarparput aningaasarsiorfigilluarsinnaallugulu.



Soorlu avataaniit aningaasaliisussarsiortarnikkut periarfissat atorluarneratigut suliniutit angisuut siuarsarneqarsinnaanerat pineqarsinnaasoq. Aatsitassarsiorneq eqqarsaatigineqarsinnaavoq.

Suliniutit mikisut pillugit nunatta iluani inuit pikkoriffii atorluarnerisigut inuussutissarsiutigisat ineriartortinneqarsinnaapput, malitsigisaanillu avammut attaveqaasersukkamik nunatta nittarsaanneqarsinnaaneranut suliaqartoqarsinnaalluni. Tamaattumik isumaqarpugut unammilleqatigiinneq, avammullu tunisassiortarneq, nittarsaassisarnerlu iluaqutaalluinnartuusut Kalaallit nunaat ineriartortinneqarneranut.

Atassummiit isumaqarpugut avammut tunioraaneq pillugu sumulluuniit attuumassuteqanngitsunik siunersuisooqatigiinnik pilersitsisoqartariaqartoq, uani inuussutissarsiutit pillugit ingerlatseqatigiiffiit siuarsartuarnissaat pinerullugu.

Taamatut oqaaseqarluta imm. 34 taparserparput Inuussutissarsiornermut Aatsitassanut ataatsimiititaliamut innersuupparput.